



Di artista Elisa Lujuez-Peters:

Access Art Gallery ta presenta exposicion "Neo Patterns"



ORANJESTAD (AAN) – Access Art conhuntamente cu Fundacion Pro Crea, ta presenta e exposicion "Neo Patterns" di e artista hoben y renombra Elisa Lejuez-Peters. Ta trata aki di un artista versatil cu den ultimo añanan a demostra di ta posee un dinamismo y consistencia sorprendente.

E labor di Elisa Lejuez ta muestra un madurez cu ta resultado di practica continuo cu ta demostra un estilo bon defini y en di bida. Elisa a cuminsa cu arte na un edad hoben y a gradua na Hogeschool van de Kusten na Arnhem y despues a sigui un año mas pa su "Masters De-

gree" den arte den e mesun academia.

Su inspiracion pa cu e exposicion aki ta surgi for di su interes pa patronchinan cu el a bin ta colecta den pasado y su experiencia den mundo di textil y moda, unda cu Elisa a traha pa varios cas di moda renombra cu a brinda e oportunidad pa realiza viahenan door di Asia, en conexion cu trabao.

Elisa mes ta bisa cu e ta crea un arte cu ta accesible pa un y tur y cu ta alavez moderno, colorido, y en di bida. E ta crea su obranan mezclando e elementonan aki y agregando color.

Forma y color di e manera aki



ta papia pa nan mes y e origen di e patronchinan ta keda pa e imaginacion y interpretacion di e espectador.

Pa Access Art Gallery y Fundacion pro Crea ta un gusto pa presenta un artista hoben cu su prome solo exposicion den

e galeria aki. Un exposicion pa cual e artista a prepara un año largo pa crea 40 obra nobo y cu sigur lo tin su impacto y influencia den arte local unda cu bida y color ta bolbe reina den e obranan. Publico en general ta keda bon bini na Access Art Gallery situa den Caya Grandi, for di 19 di december awor, pa presencia e exposicion "Neo Patterns". Pa mas informacion por tuma contacto na telefon 5887837.

TELEFONNAN DI DIARIO
582-6747- FAX 582-8551

Columna di Finchi

Shon Federico Kock: "Esnan cu ta proteha yiwana tin bon bida"!

Sr. Federico Kock di 71 año ta un di nos joya nan crioyo y e ta gusta su plantacion. Awa no a yobe pa tempo largo na Aruba y naturalmente no por tin bon plantacion cu awa di tubo so, ademas esaki ta sali basta caro y si no paga cobranza halto di awa cu e tiki placa di pension nan ta corte!

No mucho dia pasa Sr. Federico Kock a splica nos seccion su preocupacion grandi, pasobra awa no tabata yobe y te hasta el a solicita ayudo via nos seccion wak si Ministro concerni por a hiba awa pa cunukeronan pa nan por muha loke nan a sembra. Awor, e no mester e ayudo aki mas!

A haya awa for di cielo te hasta di mas, danki Dios! Pero, awor Shon Federico tin otro preocupacion. Yiwana na granel. Cantidad di yiwana cu ta come su plantacion distribi cu tur cos.

"Esnan cu ta proteha yiwana ta hendenan cu tin bon bida. Si nan mes por bin na mi plantacion mi por muestra nan kico yiwananan ta haci. Nan no sa kico e yiwananan ta haci cu plantacion cu a costa mi hopi esfuerzo pa planta. Ami, ta un cunukero cu ta planta bonchi, pinda, yambo, etc, ora cu awa yobe pa mi y mi famianan haya y pa nan come bonchi y pinda berde herbe. Nan no ta sinta pensa con nan ta haci daño na e cunukeronan, y si nan mester coi e chapi den nan man nan ta haya sa con dushi e chapimento aki ta anto den higr di solo. Sigur ora cu mi haya cosecha y nan haya pinda herbe nan ta come! Si un yiwana pone binti webo, ya ta binti yiwana y cinco yiwana pone binti webo ya ta cien yiwana y nan ta rinde masha lige. Rond Aruba tin yen yiwana y ta miles di yiwana tin den poco tempo! Mi kier puntra: pakico ta proteha e bestianan aki cu ta desgracia cosecha y alimentacion no di mi so, pero di hopi hende, tanto esnan cu ta planta como esnan cu mester alimenta di loke ta ser planta? Esaki, no por toch? Ami cu e edad aki cu mi tin no por molestia mi curpa, planta y keriendo cu mi ta bay haya un bon cosecha... ata yiwananan a distribi tur cos!

Esaki ta un cos masha tristo pa mi! No solamente pa mi so, pero tur mi bisña tur cunukero cu mi conoce nos tur tin e mesun problema: nos ta mata curpa traha den cayente di solo, cu chapi na man nos ta traha, sodor ta cay pa tur banda anto ora cu nos kere cu nos lo cosecha algo, yiwananan na cantidad a distribi y a come tur cos. Yiwana grandi y chikito. Esnan chikito ta mas peligroso, pasobra casi no por wak nan den yerba como cu nan ta mes color cu e yerba. Kico mi por haci?

Ta pa miles yiwana nos cunukero ta traha? Anto, pa colmo hende mata un yiwana e ta contra ley.

Cuanto yiwana Arubianonan tabata mata y come antes? Tur hende sa di e sopi di yiwana cu ta lanta hende malo pone riba pia? Muchanan chikito cu nace cu leukemia nan duna nan sopi di yiwana por scapa na bida, hopi hende sa esaki. Antes hopi hende ta mata y come yiwana y awor pakico no? Awor, e hendenan di bon bida sinta den nan oficina na grandi cu frescura di aircó nan no sa kico nan ta haci cu e pover cunukeronan cu tambe mester lucha pa biba cu chapi na man pa planta? Si sigui asina nos lo mester stop di planta? Sinta den veranda como pasatempo wak nan como loke nos a planta? Ta esaki nos ta haci caba, wak con nan ta distribi loke mi a planta.

Nan ta prohibi pa mata yiwana, anto yiwananan chikito y grandi na cantidad ta move tur rond di nos cas cu bista riba nos plantacion, anto ningun hende por mishi cu nan, pasobra ta contra ley?

Si e ley aki no ta beneficia ningun hende, ni cunukeronan, anto pakico no ta cambia e ley aki laga hende mata y come yiwana libremente? No ta asina e tabata antes? Pakico a cambia esaki?

Pa publicacionnan confidencial den Columna di Finchi, apreciable lector yama DIARIO na e number di telefon 582-6747, manda carta cu number y adres of pasa personalmente na redaccion. Danki pa e confianza.

WE DELIVER THE WHOLE DAY...

Little Caesars
CRAZY WEDNESDAY
pizza!pizza!
BUY ONE, GET ONE
FREE!

Medium
1ST PIZZA 2ND PIZZA
AFL. 20,50 FREE

1ST PIZZA
With one topping
2ND PIZZA
FREE
With one topping

L.G. Smith Blvd. 15
Phone: 583 2000

We deliver

